

禁燒山林訣第二百九

八九

請問皇天上洞極之師師幸哀愚生不肖乃告語以天上之事誠非小生所敢望也既加得已聞其道路使得知天上事願聞天上皆何所喜何所禁唯得其戒識日夜思惟其意不敢犯之以示後生善哉子之問也得其要意真人安坐為子道之可傳萬世無有去時也唯唯受命厚厚勿謝子為天地問疑吾主為天該非子之私也俱共公事何須謝哉欲不謝若為輕道易事愁師謝又觸忌諱不謙也但恐書益文多辭令難知故止真人言耳夫辭者道之柄文之所從起也勿悒悒方為子分別之唯唯今天上乃上皇洞平氣俱至興盛陽日光明邪氣止休正氣遂行衰者消去道德陽天上急禁絕火燒山林叢木之解何也願聞之然山者太陽也上地之綱是其君也布根之類木是其長也亦是君也是其陽也火亦五行之君長也亦是其陽也三君三陽相逢反相衰是故天上令急禁燒山林

叢木木不燒則陰中陰者稱母故倚下也天所以使子丑寅最先發去與多與多則火王火王則日更明丙丁與己午悅何也願聞之此天格也性也其母盛多而王則其子相其子相則受氣久長得延年故天上止之也陽威即陰茲日消陽衰則陰茲日起故茲稱者常起暮夜是陽衰而茲起之大證也故天上乃欲除茲故禁之也此自然之術法也天上亦然地上亦然善哉善哉請問三陽相得何故凶衰乎善哉子之問也得其意然三陽者應天陽地陽人陽三畫陽也無一陰三畫君也無一臣三畫男也無一女名為滅亡之路無後之道也不敢復傳類而不復相生成故凶也是所謂有天而無地有日而無月有上而無下有表而無裏天上名此為三敗之紀故惡之禁之也善哉愚生過問此甚畏之矣子知畏之生之根也不知畏之凶之門也唯

燒下田草訣第二百一十

請問下田草寧可燒不天上不禁燒也當燒

之獨可故當燒之乎願聞之然草者木之陰也與乙相應木者與甲相應甲者陽也與木同類故相應也乙者陰也與草同類故與乙相應也乙者畏金金者傷木木傷則衰陽陽衰則偽茲起故當燒之也又天上言乙亦陰也草亦陰也下田亦土之陰也三陰相得反共生茲故玄武居北極陰中陰極反生陽火者陽也陰得陽而順吉生善事故天上相教燒下田草以悅陰以興陽故燒之也天上亦然也甲者天上木也乙者天上之草實與卯何等也然寅者亦陽地上木也卯者陰也地上之草也此四事俱東行也但陽者稱木陰者稱草此自然之法天上之經也吾不敢欺真人也子為天問事決疑吾為天說事二人共職共理陰陽除天地之病令帝王不愁苦萬二千物各得其所莫不悅喜而出見無有冤結者善哉善哉然真人可謂知道矣不敢不敬然學而問道有何謝乎唯唯繫之曾心無有去時善哉善哉學問得其數矣

天神考過拘校三合訣第二百一十

一

今天上良善平氣至常恐人民有故犯時令而傷之者今天上諸神共記好殺傷之人或射獵獵之子不順天道而不為善常好殺傷者天甚怨之地甚惡之群神甚非之今恐小人積惡不可復禁共淹汙亂洞皇平氣故今天之大急部諸神共記之日隨其行小小共記而考之三年與閏并一中考五年一大考過重者則坐小過者減年奪算三世一大治五世一滅之故今天上集三道行文書群神共記過斷好殺傷刑罰也而興樂地上亦然真人幸為善常欲有德於皇天而憐帝王慈苦時氣不和實欲在人好殺傷或射獵獵共興刑罰常有共逆天地之心意故使久乖亂不調帝王前後得愁苦焉是重過也真人幸欲常有功於天有恩於帝王今天上積疾毒之群神教吾言故今以文付真人歸有德君以示天下人得文各自深省思過失念書言天今良平氣俱至不喜人為嫉賊吾知天上有此言今敢不下道之不言恐為嫉賊害在

吾身吾不敢犯也故以事報諸真人慎之真人不言害在子身以示凡人愚人欲犯之害在本身天亦不復過責真人也自今以往天乃興用群神使行考治人天上亦三道集行文書以記過神亦三道行文書以記過故人亦三道行文書以記過故人取象於天取象於人天地人有其事象神靈亦象其事法而為之故鬼神精氣於人諫亦諫常與天地人同時是故神應天氣而作精物應地氣而起鬼應人治而聞此三者天地中和之疾使隨神氣而動作應時而往來絕洞而無間往來難知處故今天道傳治與往古殊異以今占古多不中以古占今不復應故古文衰弱難復用用之不比中又有集處真真文故天上言拘救前後三合取中善者以明事以合意然後天上道正王道備邪惡悉去帝王大樂乃無事人自為謹得天意真人知此事重乎唯唯善哉子知其意矣

右天上禁火以興生斷刑傷殺止或射獵不順天時氣為天所惡記見在知亦初受

符更始文

太平經卷之一百一十八